

## Hōe-tiú<sup>n</sup> ê òe

### Tē-8-kài Sè-kài TBI Kap Tē-1-kài Sè-kài POJ Hák-sút GTH

Tē-8-kài Sè-kài Tâi-gí Bûn-hòa-iâ<sup>n</sup>(7/11~13) tī Ko-hiông chhī Chó-iâ<sup>n</sup> khu sūn-lī òan-sêng. Lóng-chóng ū 118 ê hák-òan chham-ka. Ko-hiông chhī Chiā Tióng-têng Chhī-tiú<sup>n</sup> ū kàu-tiú<sup>n</sup> kā lán chiok-hok, mā ū koan kè-tát NT\$12-bān kho ê tiú<sup>n</sup>-só sú-iōng-hùi. Lán iōng pē-bó-ōe ê miâ-gī kā i kám-siā.

Tâi-gí Bûn-hòa-iâ<sup>n</sup> kiát-sok ê keh-tng-jit(7/14), lán 1-phâng lāng chiū koh chò-tīn khi kàu Tâi-tang Su-hōan Hák-ī<sup>n</sup> pān-lí kap chham-ka Tē-1-kài Sè-kài POJ Hák-sút Gián-thó-hōe. Lóng-chóng ū hoat-piáu 20 phi<sup>n</sup> ê hák-sút lūn-bûn, kap-chò 1-pún 314 iáh ê lūn-bûn-chíp. Chit tiong-kan, ū 1-ê tui Tek-kok lâi ê hák-chiá, Henning Kloeter, mā lâi hoat-piáu lūn-bûn, “The History of Pêh-ōe-jī”.

Chit-pái, lán ē-tàng sūn-lī òan-sêng chiah-ê sū-kang, góa beh tī chia kám-siā chiok chē lāng. Nā m̄-sī tãi-ke hoa<sup>n</sup>-hí kam-gōan liáu sī-kan kap cheng-sîn, it-chhè lóng bô kè-kàu, kian-sim it-chì lâi tau sio-kēng, lán sit-chāi bô khó-lêng pān chit-khóan ê TBI kap GTH!

Ún-giân ūi-tiòh sêng-tam GTH ê sū-kang, ka-kī thè tãi-ke phah-jī pài-pán, bú kàu kiông beh kā sin-thé phah-phái<sup>n</sup>--khi; TLH ê Pì-su-chhù jîn-òan, ták-ê lóng chò kàu bô-mê bô-jit; Ng Lêng-lêng lâu-su koh tī Tâi-tang tiòh tng-á-iām, 1-lō thò kàu tng-á-tō kiông beh péng-péng--chhut--lâi! Kàu Ko-hiông ê sī, koh khi Ko-I Tai-hák kò kíp-chín! Lók-jîn Iù-tī-hng ê chòan-pō lâu-su, bô tiâu-kiā<sup>n</sup> bāu 7/11~13 hiān-tiú<sup>n</sup> ê khang-khòe. Che lóng-sī hō lán chin kám-tōng ê tãi-chì! Tong-jiân, ū chin-chē só-chāi m̄-sī chin chiu-chì, sīm-chì ū bē-chió lâu-kau--khi ê só-chāi, ng-bāng tãi-ke liōng-kái kap pau-hâm. Hêng-chèng ê khang-khòe chóng-sī táp-táp tih-tih chin lo-so!

2003 nî ê TBI, lán í-keng koat-tēng beh khi Jit-pún kí-pān. Sī-kan sī 8--gòeh. Pau-koat TBI 2 mê 3 kang, iû-lám kap (khó-lêng) POJ GTH, ī -tēng lóng-chóng 1 lé-pài. Kî-thāi kàu-sī tãi-ke ē-tàng tī Jit-pún sa<sup>n</sup>-kì.